

## MEINIR YW IAITH AMYNEDD...

Gwir yw, / mae dy garu, Rhys,  
yn alar / main o felys -  
nid o ran / y gusan / gaf,  
ond hawl / pob cariad olaf;  
heddiw a ddoe'n / wreiddiau hen,  
darfod / mewn ceudod / coeden....

A Rhys, / fel yr arhosais!  
Dy ddwy lath. / Neu am fedd dy lais.  
A cheisio / dy gofio'n / gry',  
arwr / anfarwol fory!  
Methu gwrthod / dy briodas,  
gan garu'n hir / â gwin gras...

Y brigau / biau rhegi  
deilen oer / ein hanadl ni,  
merch rhy wyw / i aur bywyd  
a thi'n gaeth / o unig o hyd;  
ym marw'r / iaith y mae'r ôl,  
a'i wynt a'i air / annaturiol...

Ai fi'r un / fu farw o frad?  
Neu ai cur / yw pob cariad?  
Ac ai ofer / yw'r sêr / sydd  
yn wylo / fy nghywilydd?  
A ga'i guddio / calon / cur  
rhag gwaedu'n / rhwyg o wydyr?

Rhys, dy ran / yw craith dros-dro -  
anafu / sy'n anghofio.  
O drasiedi, Rhys, / dy wir aeth  
yn ail / i gwrs dynoliaeth.  
A cheubren / fy ngwisg wen / i  
yw derwen / sy'n dy dorri.

Gwn, yn y Nant, / yn gân hir  
hen lwon / eto glywir,  
wedi i ddau / mewn cariad ddod  
yn hy^n / na'u tristwch hynod;  
ti / a fi / a modrwy fach,  
dau a'u rhwymyn / yn drymach.

*Karen Owen  
Chwefror 2020*